

հայրենիքն կայ, մեծ մասամբ բարեկեցիկ, վաճառականներ, բարձրաստիճան պաշտօնեաներ, մտաւորականներ եւ որ վերջին դէպքերը արթնցրել են նրանց մէջ անկեղծ հայրենասիրական զգացում, որ նրանք պատրաստ են անմիջապէս տեղափոխուել Հայաստան, լծուել գործի, շինել նոր եւ դարերից ի վեր երազած մի երկիր: Առայժմ եկել էր ինքը եւ իր միակ զաւակը՝ նախկին ծովային սպայ. մասնակցած է ռազմակաների ճակատամարտին եւ թէպէտ վիրաւորուած է, բայց առայժմ ողջ եւ առողջ է եւ որոշել է իր ամբողջ կարողութիւնը ի սպաս դնել հայրենիքին: «Մորհեցինք, — պատմում էր, — ես եւ զաւակս, խորհեցինք երկար թէ ի՞նչ ուղղութիւն բռնենք եւ եկանք այն եզրակացութեան, որ նորից մեր հայրենիքը ամէն բանից լաւ է: Եկա՛նք եւ ի՛նչ ուրախ եմ, որ եկանք: Զաւակս անմիջապէս լրծուեց գործի: Հայաստանը դեռ ծով չունի, ուստի զաւակս բարձրացաւ եւ դնաց լինճը փնտռելու: Մեծ լիճ է, կարելի է նաւարկել, բայց նաւ չկայ: Նաւ չկա՛յ... ուստի զաւակս որոշեց նաւ շինել: Զաւակս, պարոն, շատ լաւ տղայ է, քաջ եւ խելացի: Դու, հայրիկ, ասեց, զբարոյիւր այստեղ պատգամաւորական քո գործերով, իսկ ես դնամ նաւը շինեմ: Փող չկայ, տախտակ չկայ, գործիքներ չկան, մի քիչ դժուար է, հասկանում էք. խեղճ տղան ոտքով է դնում գալիս Սեւան: Կօշիկները պատրուել են, ցեխ է, ցուրտ է... Ասում է, ոչ ինչ, դու, հայրիկ իմ մասին մի մտածիր, ես նաւը պիտի շինեմ»... Եւ այդպէս, միշտ ոգեւորուած, խօսում ու պատմում էր. իր զաւակը, նաւը, Բեսարարիայի հայերը...

— 1919-ին Երկաթէ նաւը կայարանում կանգնած չէր:

— Հա, իսկապէս, երկաթէ նա՛ւը: Ի՞նչ եղաւ:

— Մի օր, եկաւ մի մարդ՝ լայն ուսերով, աչխոտ, կորովի՝ եւ սկսաւ նաւը չափել, յետոյ չափեց այս ճանապարհը, քայլեց, դիտեց ու դռնէ դուռ բնկաւ:

— Դռնէ դո՛ւռ...

— Այո՛: Երբ նա յայտարարեց, որ ուղում է նաւը Սեւան տանել, ամէնքը խնդացին: Երկաթէ նաւը Սեւա՞ն, կիսաքանդ եւ նեղլիկ այս ճանապարհո՞վ: Ընկաւ դռնէ դուռ... Մոռա-

ցայ ասել, որ ծովային կապիտան էր, մեր հերոսը:

— Մեր երկրում, նաւարկելու համար լեռ պէտք է բարձրանալ:

— Մեր ծովերը երկնքի մօտ են:

— Եւ սակայն մենք ունեցել ենք յանդուգն նաւավարներ: 16-րդ դարում, Հոլանդայից, հանճարեղ եւ արկածախնդիր հայեր ճեղքել են անյայտ ծովեր, դնացել են Հնդկաստան, Պարսից ծովը, Չինաստան... Մեծ հայ կապիտաններ են եղել Բիւղանդական նաւատորմիղի մէջ, աւելի ուշ տաճկականի մէջ: Ահաւոր մարդիկ, զաւանային բարքերով, խելացի եւ կորովի...

— Ինչպէս Բեսարարիացի այդ ծովային սպա՞ն...

— Ընդհակառակը: Մի օր ես նրան տեսայ. հօրը հետ մենք նստած էինք բուրձարի նստարաններից մէկի վրայ, երբ նա եկաւ Սեւանից: Երկար, նիհար տղայ էր, սպրդնած դէմքով, մտածկոտ, քիչ խօսող, վերին աստիճանի համեստ: Ծովային սպայի, փայլուն կոճակներով, սեւ վերարկու ունէր եւ զլխարկ. կօշիկները պատած էին եւ փոշիներով ծածկւած էր: Այդ տղան մտքիս մէջ մնացել է հեռաւոր երազի նման, ինչպէս բանաստեղծական մի նիւթ, որ գալիս այցելում է մեր ներքնաշխարհը եւ երբեք գոյացման ձեւ չի ստանում: Մի քիչ Գեղամ Բարսեղեանին էր նմանում: Եկաւ, նստեց եւ մի խօսք չարտասանեց: Հայերէն չէր իմանում եւ մեր հարցերին պատասխանեց հաղիւ: Աչխատում էր, դժուար է, յոյս ունի, որ մի բան կ'անի... Իսկ հայրը նայում էր նրա վրայ գորովալից աչքերով, հպարտօրէն: «Նիչեվօ, — ասում էր, — նիչեվօ Միշա (կարծեմ Միշա էր), կը տեսնես լաւ կը լինի»:

Արտասահմանում, թերթերի մէջ կարդացի, որ Սեւանայ լիճի վրայ տեղի է ունեցել «Տիգրան Երկաթ» նաւի օրհնութեան արարողութիւնը, որի վրայ գետեղել են մի թնդանոթ. ճառեր, քէֆ, ուրախութիւն... Ու տեսնում էի, երիտասարդ, կօշիկները պատրուած, գունաթափ սպային լեռնային ծովի մէջ նաւարկող ուրուական այդ ռազմանաւի վրայ, վառվռուն իր աչքերով, հպարտ եւ բախտաւոր... Թրքերի դէմ կռուի ժամանակ, հեռա-